

# Sessant'anni ad avà

U silenziu accampa a casa in la bughjura  
Di li soli, di l'ore, ci n'hè poca primura  
Longu hè statu u viaghju, cum'è a storia à cuntà  
D'una prumessa fatta, sò sessant'anni fà

A polvera s'hè sparsa annant'à la mubiglia  
Affosca pianu pianu u ritratu di famiglia  
Ch'ella sia spapersa, ch'ella sia addunita  
Ghjè u più bellu rigalu chì vi hà fattu a vita

Quanti n'avete varcatu verani è staggione  
Ùn si po' accertà ch'ella hè stata passione  
Cun lite appaciate, vintu lu crepacore  
Sì chì l'avete campata una vita d'amore

Quand'ellu ti rimira alluppiata in lu futogliu  
Chì seranu i ricordi, furtuna o curdogliu?  
Una carezza à la to manu, è la so mente fughje  
È pensa à 'sse stonde chì più nunda po' strughje

È puru sè la neve imbianca la vita  
Chì a falcina aspetta per l'ultima ferita  
Esse vechju ùn hè esse fora di tuttu  
U castagnu centannincu dà sempre lu fruttu

Quanti n'avete varcati verani è staggione  
Ùn si po' accertà ch'ella hè stata passione  
Cun lite appaciate, vintu lu crepacore  
Sì chì l'avete campata una vita d'amore